



## Ofisina Sentral di Statistik

WTC Building – Piscaderabay z/n

Tel: 839 2300

E-mail: [info@cbs.cw](mailto:info@cbs.cw)

[www.cbs.cw](http://www.cbs.cw)

Facebook: cbscur

# KOMUNIKADO PA PRENSA

Willemstad, 18 juni 2026

## Promé resultadonan di e Produkto Interno Bruto (PIB) real di Kòrsou – 2025

### Ekonomia di Kòrsou a krese ku 5,1 porshento na 2025

Willemstad; Segun e promé kalkulashon di Ofisina Sentral di Statistik (CBS) pa aña 2025, basá riba e datonan disponibel te awor, e Produkto Interno Bruto (PIB) real di Kòrsou a registrá un kresementu di 5,1 porshento kompará ku aña anterior. E kresementu aki ta reflehá un desaroyo positivo den diferente sektor importante di ekonomia, ku un kontribushon partikularmente fuerte for di e sektor turístiko.

E PIB real, òf PIB na preis konstante, ta un indikadó importante pa midí e grandura di ekonomia. E kambio den volúmen di e PIB ta indiká si ekonomia a krese òf kontraé, eliminando e efektonan di inflashon i otro kambionan di preis. Pa kalkulá e kresementu ekonómiko, CBS ta usa informashon tokante produkshon, aktividat ekonómiko i datonan spesífiko di diferente sektor empresarial pa determiná e balor agregá bruto di kada sektor. E resultadonan aki ta aún preliminar, pasobra no tur sektor a entregá nan informashon definitivo ainda.

### Puntonan prinsipal

- PIB real (2025): +5,1%

- Sektornan ku e kresementu mas haltu: Akomodashon i restorant (horeka): +10,8%, Servisionan finansiero: +9,8%, Konstrukshon: +9,4%, Transporte: +7,1%, Komèrsio: +6,8%,
- Sektornan ku desaroyo negativo: Industria: -4,4%, Enseñansa: -9,7%

### **Splikashon**

E kresementu di ekonomia na 2025 a wordu impulsá prinsipalmente pa e kontinuo ekspanshon di aktividatnan relashoná ku turismo. E sektor di horeka a registrá e kresementu mas haltu, reflehando un oumento den e kantidat di bishitantenan i den e gastunan di turista durante nan estadia na Kòrsou. Kòrsou a sigui atraé mas bishitantenan, spesialmente for di Suramérica, Canadá i Estadonan Unídos. E desaroyo aki a stimulá aktividat ekonómiko den diferente sektor ku ta dependé direkt òf indirektamente di turismo.

E sektor di konstrukshon (+9,4%) a kontribuí konsiderablemente na e kresementu ekonómiko. Invershonan den proyektonan turístiko i inmobiliario privá a kousa un oumento den aktividat di konstrukshon, sostené pa mas permit di konstrukshon i proyektonan di mayor balor.

Servisionan Finansiero i Komèrsio tambe a mostra bon resultadonan (**respektivamente +9,8% en +6,8%**), indikando ku e demanda lokal a fortalese i un oumento den transakshonnan ekonómiko.

E sektornan industrial a eksperensia un bahada den aktividatnan, prinsipalmente relashoná ku ménos trabou di mantenshon den haf. Enseñansa a registrá e kontrakshon mas grandi, relashoná na un bahada den e kantidat di studiante. E desaroyonan aki ta representá puntonan di atenshon pa maneho i planifikashon den futuro.

### **Ekonomia mundial**

Segun e perspektivanan ekonómiko internashonal, ekonomia mundial a krese ku 3,4 porshento na 2025. Esaki ta tiki mas haltu ku e kresementu registrá na 2024. Ekonomianan desaroyá a mostra un mehorashon moderado, miéntras ku Latinoamérica i Karibe a sigui registrando kresementu positivo. E region Karibeño a mantené un desaroyo faborabel, aunke na un ritmo mas moderá kompará ku e aña anterior.

Pa mas informashon tokante e desaroyo di diferente sektor ekonómiko durante 2025, por download e publikashon:

***“Economische Ontwikkeling 2025: “Een Aanhoudende Economie in Tijden van Onzekerheid.”*** disponibel riba wèpsait di CBS.

<b>Produkto Interno Bruto (PIB) pa sektor (%), Real</b>	<b>2025</b>
Agrikultura, Peska i Minería	4,0
Industria	-4,4
Kompañianan di utilidat	0,3
Konstrukshon	9,4
Komèrsio	6,8
Transporte	7,1
Horeka (Akomodashon i Restorant)	10,8
Informashon i Komunikashon	0,7
Servisionan Finansiero	9,8
Biennan Inmobiliario	4,2
Servisionan Profesional	4,2
Servisionan Administrativo	3,8
Atministrashon Públiko i Defensa; Seguridat Sosial Obligatorio	4,8
Enseñansa	-9,7
Kuido di Salú i Bienestar Sosial	3,8
Kultura, Deporte i Rekreashon	1,9
Otro Servisionan	1,2
<b>Balor Agregá Bruto</b>	<b>4,8</b>
Saldo di impuesto i subsidionan relashoná ku produktonan	7,0
<b>Produkto Interno Bruto (PIB) (%), real</b>	<b>5,1</b>